



PARTII INUIT INATSIARTUNI

Partii Inuit

UKA 2013/59-1

Randi Broberg

15. 10. 2013

Meerartaarnermut atatillugu Nunatsinni tulluarsakkamik aningaasaateqarfiliornissamut periarfissanik misissuinissaq siunertaralugu Naalakkersuisut suliffeqarnermik suliaqartunut isumaqatigiinniarnissamik aallarnisaanissaannut peqquneqarnissaannik Inatsisartuni aalajangiiffigisassatut siunnersuut. Meerartaarnermut atatillugu aningaasaateqarfiup akissarsiallit tamakkerlutik maanna ullormusiaqartitsinermit pitsaanerusumik atugaqalernissaat qulakkiissavaa.

(Inatsisartunut ilaasortaq Naaja Nathanielsen, Inuit Ataqtigiiit)

Naaja Nathanielsen-ip, Inuit Ataqtigiiit-nit siunnersuutaanut ima naatsumik Partii Inuit oqaaseqaateqassooq.

Siullermik Naaja Nathanielsen-ip siunnersuummini tunngavilersuutai paasilluarpagut, tunngaviumillu meerartaarnermut atatillugu aningaasatigut atugassarititaasut pitsanngorsaaviguarnissaat ullutsinnullu naleqqussartuarnissaat tapersorsorlutigu.

Partii Inuit isumaqataavugut aningaasaqarnikkut ajunngitsumik atugaqarneq pingaaruteqarluinnartuusoq meeqqap pitsaasumik alliatornissaanut, taamaammallu meeqqat ilaqtariillu meerartallit atugaasa pitsanngorsaaffiginissaat sulissutiguartariaqarpoq.

Taamaattoq siunnersuuteqartup saqqummiussaatus ittumik aningaasaateqarfiliornissaq toqqaannaq tapersingilarput. Nunatsinni suliffeqarfinnut aningaasarpassuarnik naleqarnissaa takorloorneqarsinnaammat, aammalu sulisartunut akissaatikinnerusunut artukkiisinaanera kiisalu kattuffiit tassani apeqqummi annerusumik qulakkeerinnittuusartut kalluarneqarnissaat takorloorneqareersinnaammat.

Taamaammat Naalakkersuisut akissummini itigartitsinerminnut tunngavilersuutaat innersuupparput.

Isumaqarpugulli misissugassaqqissinnaasoq nunat allat sanillersuuttakkatta apeqquummi tassani periusaat qanoq ittorpiaangersut, pittanngorsaaqqinnissamimi nunatsinnut tulluartitagut atorsinnaasagullu atorluarsinnaagatsigit. Siunnersuullu taamaalilluta allatut ilusilerlugu qaqeqqinneqarsinnaanera ammaffigaarput, susassaqtut tusarniaavigineqarlutik isumasiorneqarneri aallavigalugit nunatsinnut tulluartumik ilusilikkamik siunertaqarpat.

Kiisalu naggataatigut oqaatigissavarput meerartaarnermi qaammatini siullerni ilaqutariittut ataatsimoorinissamik pingaartitsinerput naqissusissagutsigu, ilumut ilaqutariittut anaanaasoq ataataasorlu assigiisillugit pineqarnissaat kiisalu aningaasatigut pitsaasumik atugassaqtinnissaat pingaartitatut inuattut naleqartitatut naqissusissagutsigu, taava tamanna pingaartitsineq pisussaaffiliivoq pissutsinik equngasorisanik pitsanngorsaanissamut. Pingaartitsinerinnarmi naammangilaq, pingaartitalli pimoorutivillugit timitalersortariaqarput. Taamaaliornissamullu Partii Inuit piumassuseqarpugut isummersoqataanissamut, taamaammallu una siunnersuut taama isikkoqartillugu itigartikkaluarlugu ataatsimiisitaliami susassaqtumi eqqartorneqarnissaa ammaffigaarput.